

ravedis, y del Ypre menor a quarenta e çinco maravedis, e del Bruselas de los menores a çinquenta maravedis, e por la vara de la escalrrata de Doay a ciento e çinquenta maravedis, e de la escalrrata de Gante a çiento e diez maravedis, e de la escalrrata de Ypre a çiento e diez maravedis, e de la escalrrata de Monpesler a çiento e veynte maravedis, e de la escalrrata de Mellinas a çiento e diez maravedis, e de la escalrrata viada a nouenta maravedis, e por la vara del panno de Brujas a quarenta e çinco maravedis, e del Artoy a veynte e seys maravedis, e de los blancos de Ypre a treynta maravedis, e de Camunnas a veynte maravedis, e de Tornayre a veynte maravedis, e por la vara del viado de Terramondo a veynte e çinco maravedis, e del viado de Gante a quarenta maravedis, e del viado de Ypre a diez e ocho maravedis, e por la vara del ingles de los menores a veynte maravedis, e por la vara del panno de Pamiaz a treynta maravedis, e de Picardia a veynte maravedis, e de Cartaxena a veynte e çinco maravedis, e de Limos a treynta maravedis, e de Funjoy a veynte e çinco maravedis.

Porque vos mandamos, vista esta nuestra carta o el traslado della signado como dicho es, a cada vnos de uos en vuestros lugares e jurediçiones que fagades luego pregonar que ningunt mercador nin otro alguno que non sean osados de vender nin conprar la vara de los dichos pannos nin de qualquier dellos por mayor quantia de las que dichas son et qualquier que lo vendiere o conprare que por la primera vez que pierda el panno que vendiere o conprare e por la segunda vez que pierda lo que ha e por la terçera vez que lo maten por ello et destas penas mandamos que sean las dos partes para nos e la terçera parte para el acusador. Et los vnos e los otros non fagades ende al por ninguna manera so pena de la nuestra merçed e de los cuerpos e de quanto auedes.

Dada en Toro, quatro días de nouienbre, era de mill e quatroçientos e siete annos. Nos el rey.

XXVIII

1369-XI-12, Toro.—Provisi3n real al concejo de Murcia, perdon3ndole la deuda de ocho mil trescientos treinta maraved3s, que la ciudad hab3a tomado de las rentas reales. (A.M.M. Cart. real 1405-18, eras fol. 28r.)

Don Enrique, por la graçia de Dios rey de Castiella, de Leon, de Toledo, de Gallizia, de Seuilla, de Cordoua, de Murçia, de Jahen, del Algarbe, de Algezira e sennor de Molina, al conçeio e alcalles e alguazil e ofiçiales e omnes buenos de la noble çibdat de Murçia, salud e graçia.



Sepades que viemos vuestras peticiones que nos enbiastes pedir merçed en que ocho mill e treçientos e treynta maravedis que vos auia des tomado en pan e en dinero, despues que aquel traydor tirano ereje murio, del almozarifadgo dende e de Pagan Ruiz e de otras partes para cosas que ouiestes menester para pro desta çibdat, los quales, en nuestro nonbre e por el poder que de nos tenia e tiene, el conde don Johan Sanchez Manuel vos auia quitado, que fuese nuestra merçed de uos los quitar e de enbiar mandar que los non pagasedes.

A lo qual respondemos que nos plaze de uos los quitar e quitamovoslos e fazemos vos merçed dellos segunt que mas conplidamente el dicho conde vos los quito en nuestro nonbre, et por esta nuestra carta mandamos a Gomez Garçia nuestro thesorero mayor e a don Jacob Axaques su recabdador en el obispado de Cartagena o a otro qualquier que fuere nuestro thesorero o recabdador agora e de aqui adelante que vos non demande los dichos ocho mill e treçientos e treynta maravedis que uos tomastes o mandastes tomar al dicho tiempo segunt dicho es nin vos tomen nin prendan ningunos de vuestros bienes por la dicha razon, et sy algunos de vuestros bienes vos han tomado o prendado por la dicha razon mandamos que vos sean luego dados e entregados bien e conplidamente en guisa que vos non mengue ende ninguna cosa que nos por esta nuestra carta vos damos por quitos e por libres dellos segunt dicho es. Et non fagades ende al por ninguna manera so pena de la nuestra merçed.

Dada en Toro, doze dias de nouienbre, era de mill e quatroçientos e siete annos. Nos el rey.

XXIX

1369-XI-20, Toro.—Carta de merced al concejo de Murcia, nombrando alcalde de las cosas vedadas a Luis Seguín. (A.M.M. Cart real 1405-18, eras, fols. 28v.-29r.)

Don Enrique por la graçia de Dios rey de Castiella, de Leon, de Toledo, de Gallizia, de Seuilla, de Cordoua, de Murcia, de Jahen, del Algarbe, de Algezira e sennor de Molina. Por fazer bien e merçed a vos Luys Seguín nuestro vasallo por muchos seruiçios e bienes que nos auedes fecho e fazedes de cada dia e porque sopiemos que la guarda que nos pusieramos en los puertos para guardar las cosas vedadas que se non sacasen fuera de los nuestros regnos a otras partes que se non se guardauan asy commo cunplia a nuestro seruiçio, tenemos por bien que seades nuestro alcalde e guarda en todo el obispado de Cartagena de todas las cosas que fueron vedadas en tiempo del rey don Alfonso nuestro padre, que Dios perdone, e despues aca que pasaren e leuaren a Aragon e a tierra de moros, que guardedes

